

**UNIVERZITET U ZENICI
PRAVNI FAKULTET**

**Upute autorima za objavljivanje članaka
u ANALIMA Pravnog fakulteta
Univerziteta u Zenici**

ZENICA, 2018.

§ 1.

Časopis „Anali Pravnog fakulteta Univerziteta u Zenici“ objavljuje radove iz oblasti društvenih nauka.

Redakcija prima rukopise na bosanskom, hrvatskom, srpskom, engleskom, francuskom i njemačkom jeziku, a odlukom redakcije može biti prihvaćeno objavljivanje rukopisa i na nekom drugom stranom jeziku.

Autori zadržavaju autorska prava za članke objavljene u časopisu, ali daju časopisu pravo objavljivanja, kako u štampanom, tako i u elektronskom obliku.

Radove prihvaćene za objavljivanje ili već objavljene u Časopisu „ANALI Pravnog fakulteta Univerziteta u Zenici“ autor smije objaviti u drugim publikacijama samo uz dozvolu redakcije, ali i u tom slučaju samo uz jasnu naznaku o njihovom objavljivanju u „ANALIMA Pravnog fakulteta Univerziteta u Zenici“.

§ 2.

Radovi treba da sadrže sljedeće dijelove: ime i prezime autora, naziv i sjedište ustanove zaposlenja, naslov rada (b/h/s jezik), naslov rada (eng./njem./franc. jezik), sažetak sa ključnim riječima (b/h/s jezik), sažetak sa ključnim riječima (eng./njem./franc. jezik), uvod, glavni dio rada, zaključak i popis literature.

Sažetak treba da sadrži do 250 riječi.

Sažetak rada treba sadržavati opći prikaz teme, metodologiju rada, rezultate i zaključak.

Ključne riječi sadrže pojmove koji se pojavljuju u tekstu, ali ne opće i preširoke pojmove niti preuske pojmove opisane sa puno riječi.

§ 3.

Naučni i stručni radovi moraju sadržavati najviše 10.000 riječi, uključujući sve dijelove rada. Izuzetno, članovi uređivačkog odbora mogu donijeti odluku o prihvatanju rada koji sadrži do 12.000 riječi, ukoliko je to od značaja za razvoj pravne teorije i prakse.

Ostali radovi sadrže do 2.000 riječi uključujući sve dijelove rada.

Sav tekst treba biti napisan u fontu 12, Times New Roman, prored 1,5.

Tekst ne smije sadržavati zaglavlja (Header) niti ponodžja (Footer).

Sve fusnote trebaju biti napisane u fontu 10, Times New Roman, prored 1,0 i u formatu „Footnote“.

Sve margine stranice trebaju biti promjera 2,5 cm.

Numeracija naslova i podnaslova treba biti označena arapskim brojevima (npr. 2. „Naslov“, 2.1. „Podnaslov“ i 2.1.1. „Podpodnaslov“).

§ 4.

Način citiranja u okviru cjelokupnog rada mora biti jedinstven.

Tablice i grafikoni trebaju biti prezentirani u programima kao što su MS Word, sa jasno iskazanim naslovima.

Sve tablice i grafikoni biti će u printani isključivo u crno-bijeloj boji.

§ 5.

Ukoliko rukopis zadovoljava kriterije časopisa, upućuje se na recenziju.

§ 6.

Časopis „Anali Pravnog fakulteta Univerziteta u Zenici“ objavljuje radove koji podliježu recenziji kao i one koji ne podliježu recenzetskom postupku.

Recenziji podliježu radovi koji se kategorizuju (izvorni naučni rad, prethodno priopćenje, pregledni naučni rad, i stručni članak).

Prikazi knjiga, sudska praksa, osvrti, obavijesti i ocjene ne podliježu recenziji.

Recenzentski postupak je anonimn.

Radi anonimizacije rukopisa, koja se obavlja uklanjanjem imena autora i drugih podataka koji posredno mogu ukazati na identitet autora, neprihvatljivo je da autor u radu piše na način da je identitet autora moguće otkriti iz načina na koji upućuje na vlastite radove.

Nakon ocjene recenzenata i članova redakcije, rukopis se vraća autoru s obrazloženjem i zahtjevima za doradu i ispravak rada, ukoliko se to smatra potrebnim.

Ispravljene rukopise autori trebaju vratiti redakciji u roku od 8 dana od primanja istih.

§ 7.

Autori dopuštaju časopisu postavljanje njihovih radova na web stranicu časopisa.

Časopis zadržava i sva ostala prava, osim ukoliko nije drugačije dogovoreno s autorom.

Radovi koje časopis objavljuje su:

- Uvodna riječ glavnog urednika
- Izvorni naučni rad
- Prethodno saopćenje
- Pregledni naučni rad
- Stručni rad
- Studenstki rad
- Sudska praksa
- Ostali radovi kao što su prikaz knjige, izvještaji o znanstvenim i stručnim skupovima i dr.
- Obavijesti o nadolazećim stručnim i znanstvenim skupovima
- Domaći autori u međunarodnim publikacijama
- Poziv autorima

§ 8.

Radovi redakciji trebaju biti dostavljeni u elektronskom obliku (e-mail ili CD) ili na papiru poštom u tri jednaka primjerka.

§ 9.

Uz radove autori potpisuju izjavu o originalnosti rada.

Uz naslov rada nužno je navesti ime, prezime i titulu autora, naziv i adresu ustanove ili kućnu adresu, te e-mail adresu.

§ 10.

Redakcija prima isključivo neobjavljene radove.

Rad ne smije biti već objavljen ili u tom cilju upućen drugom časopisu.

Nakon objave poziva za slanje radova, svoje radove autori mogu slati na:
redakcija@prf.unze.ba

ili poštom na adresu:

Pravni fakultet Univerziteta u Zenici

Fakultetska 3

72000 Zenica

Bosna i Hercegovina.

§ 11.

Rukopisi koji nisu u skladu s navedenim uputama biti će vraćeni autorima.

U cilju racionalizacije troškova izdavanja časopisa, objavljeni radovi se ne honorarišu.

§ 12.

U časopisu će biti objavljivani i sažeci stručnih i naučnih radova objavljenih u međunarodnim publikacijama indeksiranim u relevantnim bazama podataka.

Članovi uređivačkog odbora mogu odlučiti da objave sve pristigle sažetke izvornih radova domaćih autora.

§ 13.

Prilikom citiranja autori treba da dosljedno primjenjuju sljedeća pravila citiranja:

PRAVILA CITIRANJA

1. Knjige

Prvo slovo imena (nakon kojeg slijedi tačka) i prezime autora, naziv knjige, izdavač (ako je poznat), mjesto izdanja te godina izdanja. Naziv knjige treba biti napisan u kurzivu. Ako se navodi i broj strane on se nakon zareza piše bez ikakvih dodataka (poput str. i slično). Između mjesta izdanja i godine izdanja ne stavlja se zarez.

Primjer: A. Duraković, *Projektni i krizni menadžment*, Minex, Sarajevo 2009, 45.

2. Knjige sa više izdanja

Ukoliko knjiga ima više izdanja, uvijek se navodi ono izdanje koje se koristilo u radu. Broj izdanja navodi se uz skraćenicu "izd." prije navođenja izdavača.

Primjer: E. Muminović, *Procesno međunarodno privatno pravo*, 2. izd., Pravni fakultet Univerziteta u Sarajevu, Sarajevo 2008.

3. Upućivanje na fusnotu

Ukoliko se upućuje na fusnotu, poslije broja stranice treba biti dodat zarez i napisana skraćena „fn.“.

Primjer: A. Duraković, *Projektni i krizni menadžment*, Minex, Sarajevo 2009, 45, fn. 31.

4. Knjige sa više mjesta izdanja

Ukoliko autor u knjizi navodi više mjesta izdanja, ona trebaju biti navedena uz razdvajanje crticom.

Primjer: Ch. Grabenwarter/S. Griller/M. Holoubek, *Europäisches und öffentliches Wirtschaftsrecht I*, 6. izd., Springer Verlag, Wien-New York 2009.

5. Knjige sa većim brojem autora

Ukoliko postoji više autora knjige ili članka (do tri), trebaju biti razdvojeni kosom crtom, kao što je prikazano u primjeru iznad.

Ukoliko autor citira knjigu ili članak sa više od tri autora treba navesti prvo slovo imena (sa tačkom) i prezime samo prvog autora, uz dodatak skraćenice riječi *et alia* (*et. al.*) kurzivom.

Primjer: Dž. Drino *et al.*

6. Knjige sa urednikom kao autorom

U slučaju zbornika radova i sličnih djela, urednik/urednica ili urednici, tretiraju se kao autori. Iza imena u zagradi navodi se skraćenica „ur.“.

Primjer: G. Reichelt (ur.), *Europäisches Gemeinschaftsrecht und IPR – Ein Beitrag zu Kodifikation der allgemeinen Grundsätze des Europäischen Kollisionsrechts*, Manz, Wien 2007.

7. Knjiga prevedena sa stranog jezika

Ukoliko je knjiga prevedena sa stranog jezika, prevodilac se navodi iza naslova.

Primjer: T. C. Hartley, *Osnovi prava Evropske zajednice – Uvod u ustavno i upravno pravo Evropske zajednice*, preveo O. Račić, Pravni centar, Sarajevo 1994.

8. Knjiga u seriji od više knjiga

Broj knjige u seriji od više knjiga treba biti naveden iza opšteg naslova serije.

Primjer: I. Ostojić, *Benediktinci u Hrvatskoj i ostalim našim krajevima*, knjiga 3, *Benediktinci u Panonskoj Hrvatskoj*, Benediktinski priorat Tkon (kod Zadra), Split 1963.

9. Knjiga jednog autora ili urednika u seriji sa glavnim urednikom drugog imena

Ukoliko se knjiga javlja u ediciji koja ima generalnog urednika, a urednici pojedinih djela su različiti, na prvom mjestu se kao autor navodi pisac ili urednik tog djela, a ne glavni urednik. Iza naziva djela treba navesti broj knjige u seriji a zatim, odvojen zarezom, glavnog urednika serije.

Primjer: J. Stipišić/ M. Šamšalović (ur.), *Codex Diplomaticus Regni Croatiae, Dalmatiae et Sloveniae*, knjiga 1., ur. serije M. Kostrenčić, Izdavački zavod Jugoslovenske akademije znanosti i umjetnosti, Zagreb 1967.

10. Jedan ili više tekstova od istog autora

Ukoliko autor u radu citira samo jedan tekst određenog autora, kod ponovljenog citiranja tog teksta, poslije prvog slova imena (sa tačkom) i prezimena autora, slijedi samo broj strane i tačka (bez dodataka *op. cit.*, navedeno djelo i sl.).

Primjer: Š. Baraković, 47.

Ukoliko autor pak citira više radova istog autora, bilo knjiga ili članaka, a nakon što je prvi put naziv svakog rada naveden u punom obliku, poslije prvog slova imena (sa tačkom) i prezimena autora, u zagradi treba biti navedena godina izdanja knjige ili članka.

Ukoliko iste godine autor ima više objavljenih radova koji su citirani, uz godinu trebaju biti dodata slova a, b, c, d, itd., poslije čega slijedi samo broj strane (bez dodataka).

Primjer: T. Haverić (2010 a), 78.

11. Članci u naučnim časopisima

Prvo slovo imena (sa tačkom) i prezime autora, naziv članka pod navodnicima, naziv časopisa u kurzivu (zato što se i knjige navode u kurzivu), broj i godište, te broj stranice koja je iz tog članka citirana bez ikakvih dodataka.

Ukoliko je naziv časopisa dug, prilikom prvog citiranja u zagradi se navodi skraćunica pod kojom će se periodika nadalje pojavljivati. Za razliku od serije knjiga, ovdje se ne navodi glavni urednik.

Primjer: Z. Meškić, „Kolizione norme za zaštitu potrošača u direktivama Evropske zajednice i Uredbi Rim I – novi izazov za ZRSZ”, *Zbornik Pravnog fakulteta Sveučilišta u Rijeci (Zb. Pf. Sveuč. Rij.)*, 2/2009, 1012.

12. Članci u novinama

Članci u novinama trebaju biti navedeni prema datumu, bez navođenja broja novina.

Primjer: T. Lazović, Evropska diplomatska elita stiže u Sarajevo, *Oslobođenje*, 26. maja 2010., 8.

13. Članci u zborniku radova

Zbornik radova nije serijska publikacija, pa je tretiran kao knjiga. Članci trebaju biti navedeni poput članaka u časopisima, uz prilog „u” i navođenje urednika i naziva zbornika.

(*Paznja*: Časopisi pravnih i drugih fakulteta često nose naziv „Zbornik” ili „Zbornik radova”. Uprkos nazivu, radi se o serijskim publikacijama.)

Primjer: P. Lagarde, „Remarques sur la proposition de règlement de la Commission européenne sur la loi applicable aux obligations contractuelles (Rome I)”, u G. Reichelt (ur.), *Europäisches Gemeinschaftsrecht und IPR – Ein Beitrag zu Kodifikation der allgemeinen Grundsätze des Europäischen Kollisionsrechts*, Manz, Wien 2007, 13.

14. Članci u enciklopediji ili leksikonu

Članci u enciklopedijama obično ne sadrže ime autora. Njih treba navoditi bez broja stranice, pa umjesto broja stranice treba koristiti samo latinsku skraćenicu „s.v.” (sub verbo).

Primjer: *Enciklopedija Jugoslavije*, 2. izd., Jugoslavenski leksikografski zavod, Zagreb 1980, s.v. „Hrvati”.

Ukoliko je riječ o dužem članku, naročito u specijalizovanim priručnicima, treba navesti i ime autora. Ime autora moguće je pronaći i na listi autora na početku enciklopedije. Nekada enciklopedije sadrže i ime urednika, pa članci trebaju biti navedeni kao u zbornicima radova, ali bez broja stranica.

Primjer: Reinhard Zimmermann, „Common Frame of Reference”, u J. Basedow/K. J. Hopt/R. Zimmermann (ur.), *Handwörterbuch des Europäischen Privatrechts*, Mohr Siebeck, Tübingen 2009.

15. Neobjavljeni rukopisi i arhivski izvori

Kod arhivske građe treba navesti ime arhiva (npr. Državni arhiv u Sarajevu), arhivskog fonda (Spisi trogirke kancelarije) ili zbirke te, ukoliko postoji, oznaku arhivske jedinice za građu koja je korištena.

Primjer: G. Tanzlingher-Zanotti, „La dama cronologica” ili „Notizie storiche di Zara”, Znanstvena knjižnica Zadar, 28254 Ms 762.

16. Magistarski rad ili disertacija

Za razliku od objavljenih knjiga, nazivi magistarskih i doktorskih radova trebaju biti napisani pod navodnicima, nakon čega slijedi vrsta rada (magistarski rad/doktorska disertacija), akademska institucija u kojoj je rad pisan i odbranjen, te godina odbrane.

Primjer: A. Brkić, „Uloga i značaj načela pouzdanja u zemljišne knjige de lege lata i de lege ferenda u BiH“, magistarski rad, Pravni fakultet Univerziteta u Zenici, 2009.

17. Publikacija u štampi

U slučaju da autor navodi djelo koje još nije izašlo, ali je njegov izlazak izvjestan, iza mjesta izdanja odvojeno zarezom treba bit navedeno: „u štampi“.

Primjer: A. Huseinspahić/Dž. Drino, *Komparativno nasljedno pravo*, Pravni fakultet Univerziteta u Zenici, Zenica, u štampi.

18. Citiranje više stranica teksta

Ukoliko autor citira tekst sa više tačno određenih strana, one trebaju biti razdvojene crticom, poslije čega slijedi tačka.

Ukoliko autor citira više strana koje nisu tačno određene, poslije broja koji označava prvu stranu treba navesti: „i dalje“ s tačkom na kraju.

Primjer: H. Kurtović/K. Hodžić, 95-104.

Primjer: H. Kurtović/K. Hodžić, 76 i dalje.

19. Ponavljanje citata

Ukoliko autor citira podatak s iste strane iz istog djela kao u prethodnoj fusnoti, treba koristiti skraćenicu za *ibidem* u kurzivu, s tačkom na kraju (bez navođenja prezimena i imena autora).

Primjer: *Ibid.*

Ukoliko autor citira podatak iz istog djela kao u prethodnoj fusnoti, ali s različite stranice, treba koristiti skraćenicu *ibid.*, uz navođenje odgovarajuće strane i stavljanja tačke na kraju.

Primjer: *Ibid.*, 114.

20. Propisi

Propise u radu autor navodi pod njihovim punim nazivom; zatim navodi glasnik u kojem je propis objavljen, a poslije zarezom broja i godina objavljivanja. Ukoliko će navedeni propis biti citiran ponovo, prilikom prvog pominjanja poslije crte treba navesti skraćenicu pod kojom će propis dalje biti korišten.

Primjer: Zakon o obligacionim odnosima – ZOO, „Službeni list SFRJ“, br. 29/78.

Ukoliko je propis izmijenjen i dopunjen, brojevi i godine objavljivanja izmjenjena i dopuna trebaju biti navedeni sukcesivno.

Primjer: ZOO, „Službeni list SFRJ“, br. 29/78, 39/85, 46/85, 45/89, 57/89, „Službeni list RBiH“ br. 2/29, 13/93, 13/94 i Službene novine Federacije Bosne i Hercegovine br. 29/03.

21. Sudske odluke

Navođenje sudskih odluka treba da sadrži što potpunije podatke (vrsta i broj odluke, datum kada je donesena publikacija u kojoj je eventualno objavljena).

Primjer: Vrhovni sud BiH, br. Rev-271/90, od 22.III.1991. Bilten Vrhovnog Suda BiH, br. 1991/2, Novinsko-izdavačka organizacija Službeni list SRBiH, Sarajevo 1991.

22. Strani pojmovi i internet stranice

Strani pojmovi, latinske izreke i internet stranice trebaju biti napisani kurzivom.

Citiranje tekstova sa interneta treba da sadrži naziv citiranog teksta, adresu internet stranice i datum posljednjeg pristupa stranici.

Članci i knjige koje su korištene preko interneta, iako su bile dostupne u punom tekstu u kojem su i objavljene dodatno se navode sa elektronskom adresom, i datumom zadnjeg pristupa u zagradi .

Wikipedia i slične internet enciklopedije ne mogu se smatrati naučnim izvorima.

Primjer: European Commission, The Proposal for a Directive on Consumer Rights: Impact on Level of National Consumer Protection,

http://ec.europa.eu/consumers/rights/docs/comparative_table_en.pdf (09.02. 2010.)

Čak i ako internet izvor biva naveden nakon tačke, prvo slovo je malo (malo “h” od “http”), a na kraju ne trebaju biti stavljeni znakovi interpunkcije, kako ne bi došlo do pretpostavke da je znak interpunkcije dio internet adrese.

Ukoliko internet adresu biva prebaćena u drugi red, do prekida treba doći **prije** tačke, zareza, crte, upitnika, crtice, znaka postotka, jednakosti ili broja, ali **poslije** kose crte, bilo jednostruke ili dvostruke.

Primjer: I. Kunda, “Uredba Rim II: ujednačena pravila o pravu mjerodavnom za izvanugovorne obveze u Europskoj uniji”, *Zbornik Pravnog fakulteta Sveučilišta u Rijeci*, 2/2007, 1269-1324, http://hrcak.srce.hr/index.php?show=clanak&id_clanak_jezik=39805 (15. maj 2010.)